

Mistral Gion Rest Solèr : 1895-1958

Autor(en): **Derungs, Chr.**

Objektyp: **Obituary**

Zeitschrift: **Annalas da la Societad Retorumantscha**

Band (Jahr): **72 (1959)**

PDF erstellt am: **30.06.2024**

Nutzungsbedingungen

Die ETH-Bibliothek ist Anbieterin der digitalisierten Zeitschriften. Sie besitzt keine Urheberrechte an den Inhalten der Zeitschriften. Die Rechte liegen in der Regel bei den Herausgebern.

Die auf der Plattform e-periodica veröffentlichten Dokumente stehen für nicht-kommerzielle Zwecke in Lehre und Forschung sowie für die private Nutzung frei zur Verfügung. Einzelne Dateien oder Ausdrucke aus diesem Angebot können zusammen mit diesen Nutzungsbedingungen und den korrekten Herkunftsbezeichnungen weitergegeben werden.

Das Veröffentlichen von Bildern in Print- und Online-Publikationen ist nur mit vorheriger Genehmigung der Rechteinhaber erlaubt. Die systematische Speicherung von Teilen des elektronischen Angebots auf anderen Servern bedarf ebenfalls des schriftlichen Einverständnisses der Rechteinhaber.

Haftungsausschluss

Alle Angaben erfolgen ohne Gewähr für Vollständigkeit oder Richtigkeit. Es wird keine Haftung übernommen für Schäden durch die Verwendung von Informationen aus diesem Online-Angebot oder durch das Fehlen von Informationen. Dies gilt auch für Inhalte Dritter, die über dieses Angebot zugänglich sind.

Mistral Gion Rest Solèr

1895 — 1958

da Chr. Derungs

Vigelgia Nadal 1958 ha Vrin viu in conduct de bara sco aunc mai: umens ed umens ord tut ils vitgs lumnezians, la dertgira circuitala cun il salter de cumin en mantiala ufficiala, magistrats e magisters neuaden dalla Foppa, giu dalla Cadi, si da Trin e Tusaun, Portenza e Cuera, ina delegaziun dil Cantun Grischun consistenta ord president e vicepresidente dil Cussegl grond cun il salter cantonal en ornat, plinavon ina representanza della regenza, representants dellas combras federalas, l'Uniun purila sursilvana en corpore, delegaziuns della Uniun purila cantonale, della SAB, della Ligia Romontscha e della NOK. Sto bein esser, ch'ei setracta de render la davosa honor ad in dils pli gronds vischins de Vrin. Igl ei sgr. mistral Gion Rest Solèr, ch'il Tutpussent ha dumengia vargada tut nunspetgadamein clamau alla perpetnadad. La participaziun extraordinari gronda alla sepultura ha manifestau eclatantamein la gronda stema e simpatia ch'il defunct ha giu acquistau entras siu nunstunclenteivel operar en survetsch della publicitad.

Sco scolast ha il permiert instruiu ed educau en la scola primara de Vrin naven da 1915 tochen 1955. Penetraus dagl ideal de sia clamada e possedend leutier tuttas bunas qualitads e habilitads eis el gleiti renconuschius ed enconuschents per in capavel magister. El possedeva in dun aparti de cumpartgir ch'el ha cultivau e perfeczionau, aschia ch'ins stueva admirar sia habilitad retorica sin conferenzas e radunonzas. Adina raccoltavan ses discuors e referats fatgs cun viarva pulpida e culonta in ferm applaus. Buca de smarvegliar che ses convischins en vischnaunca e cumin han elegiu el els pli aults

uffecis. Da 1937 — 1941 ei G. R. Solèr mistral de cumin e da 1935 tochen sia mort nuninterrutamein deputau dil Cussegl grond. Il meglier mussament de sia activitad politica e habilitad parlamentarica ei senz'auter il fatg, che mistral Solèr vegn elegius president dil Cussegl grond igl onn 1946. Era quest pli ault uffeci ch'il cantun sa dar ad in de ses conburgheis ha el exercitau per cumpleina cuntentientscha.

Quei che interessescha forsa pli fetg il stimau lectur dellas Annalas, ei denton la premura de mistral Solèr per mantener e promover il romontsch. Gia sco giuven magister s'informava el cun mintga caschun tier amitgs e collegas sur de plaids, expressiuns e fuormas els differents loghens. El discureva era bugen cun glied pli passada, per aschia far enqual scoperta en favur dil romontsch. Mintga sessiun dil Cussegl grond fageva el lu ina viseta a sgr. prof. dr. Ramun Vieli p. m., scargond il material rimnau.

Mistral Solèr ch'enconuscheva fetg bein la historia grischuna ei era sestentaus grondamein per perscrutar l'istoria locala de Vrin e Lumnezia. Sco fretgs de sia nunstunclenteivla premura possedein nus oz in pèr stupentas lavurs litteraras ord sia plema, numnadamein: «Sur in pass emblidau», Ischi XXV 1936; «Vrin, igl encarden lumnezian», Glogn 1947 e «Sur Balzer Alig», Calender Romontsch 1956. Mistral Solèr ha scret cun bia maletgs originals e bi lungatg. E sco el era en conversaziun e cumpignia adina da bien humor, aschia ein era ses products litterars cungi da bia spass, tuccas e storgias. Tut quei ch'el ha scret, flada attaschadadad al tschespet patern e viv interess ed affecziun per historia e cultura, per tiara e pievel. Ils plaids, culs quals el ha concludiu sia lavur «Sur Balzer Alig», savein nus cun pintga excepziun era applicar tier nossa conclusiun e scriver: Mistral Gion Rest Solèr ei staus en plaid e fatg, en senn e spért, in fideivel survient de siu pievel, in um de prestaziun! R. I. P.